

崑新兩縣續補合志卷十

名宦

名宦者所以紀一方之遺愛也古今以來治亂多端事變繁矣而循良之選史不絕書蓋廉明之吏慈惠之師固無時無地不可造福於民者也光緒己卯後牧斯土者已更多任其有實惠及民者皆詳著政績於篇

廖綸號養泉四川巴江人以諸生膺薦舉累官至縣令同治七年爲新陽令下車卽以興養立教爲先學宗朱子用純因創建孝定祠於玉山書院西偏知止山房基以朱愼幾王素巖及潘確潛等十二人祔祀每朔望率邑

紳士躬詣洒掃卽設法坐講藍田呂氏鄉約令各載日記手自評閱又書柏廬家訓鏤板列祠壁提倡理學儒風爲振復設莊渠義塾延師課士邑境故多低窪遇靈雨田禾輒湮沒綸親歷四鄉測量水勢高下督令加築圩岸以捍潦災不憚勞瘁農民感之又購桑秧數萬株給四鄉分種并著種桑說以勸民蠶惜地勢低下不利栽植旋去任未竟其效綸居官時凡地方利弊皆周諮博訪故能深知民隱興革胥宜書法平原寸縑尺幅人爭寶之九年冬以憂去官光緒辛卯自蜀來崑寓鴛湖寄墅年已七十餘鬻書自給當道請謁輒謝時與二三耆舊徒步至孝定祠展謁求書者踵相接逾數月乃歸

邑人至今思之

俞錫疇字壽田安徽鳳陽人乙酉拔貢光緒甲辰春來權崑山縣事前令劉有光及新陽令陳紹唐皆尙姑息外來幫匪鉤通地痞流氓白晝劫奪訛詐甚至掠人勒贖城廂內外徧布數百人道爲之梗官吏相視莫敢誰何錫疇將泣任先微行偵得其尤橫者主名及視事日擒其渠悉置之法餘黨駭散民始安堵其泣任也屏騶從謝幕友不攜妻孥晨坐堂皇案無畱牘恩威兼濟賞罰無私吏役爲之斂跡無敢舞弊文作好不數月頌聲大作會以興辦學堂不合上官意同僚亦陰擠之遂以親老求去時縣令一歲之人皆仰於冬漕將屆開徵錫疇潔

崑新兩縣續補合志

卷十

名宦

二

身遠引人尤難之

以上
令

徐嘉字賓華一字遜齋山陽人同治庚午舉人生平服膺亭林遺書尤篤嗜其詩字箋句釋依據正史旁引明季裨乘小說以證明事蹟積十餘年始葺事刊印行世光緒癸卯選崑山教諭之官後以興教育才勸善懲惡爲務鄉鎮講約必親泣焉鳳陽俞錫疇宰崑山以師禮事之嘉爲陳地方利病錫疇用其言遂著循聲所著自亭林詩注外有靜志居詩集味靜齋文詩稿語錄等書戊申引疾去年八十卒於家

以上
教授

補遺

梁

周鐵虎承聖二年以功封沌陽侯仍爲散騎常侍時崑山

始置信義郡以鐵虎領太守

王 志 附 見

周文育字景德少孤貧義興養爲己子後預平侯景封

南移侯拜信義太守後諡忠愍

王 志 附 見

唐

李宋太宗第十子紀王慎裔孫也爲崑山令

宋

李維字仲方洛州肥鄉人文靖公沆弟舉進士爲崑山令

至道三年獲白龜獻之郡歷翰林學士中書舍人尚書

左丞卒贈右僕射

劉藻字德清金華人淳熙八年以進士知崑山八月十七

崑新兩縣續補合志

卷十

名宦補遺

三

夜惠應廟災火甚熾藻叩頭火滅尚書黃由有誠應記

紀其事

潘 道 根 朱 志 補

高衍孫四明人知崑山縣嘉定戊寅初設嘉定縣臺使奏

衍孫主其事衍孫以東五鄉民頑獷已久若一切迫之

鳥獸散耳請以八年九年畸零二稅爲營建費又秋苗

減耗夏稅兌增罷財糾司以絕橫斂籍分淳頑以示勸

懲行之三年俗以丕變

明

吳昭字伯昭麗水人正統十三年以監生擢知崑山始建

城隍廟於馬鞍山陽問潮館於駟馬橋右

王 志 堅 府 志 稿

劉鱗長字乾所萬曆己未進士崇禎四年以常州府通判

署縣事清廉公正善於其職見嘉善陳龍正四難三易

記文震孟顧錫疇有生祠記

潘道根
朱志補

劉士斗字瞻父號映薇南海人崇禎六年以太倉知州來

署縣事適漕卒恣暴民譁忌者以聞左調去民號呼負

磚石填城門適巡鹽使者行部羣訴且泣御史為奏畱

不得後擢建昌兵備僉事殉節蜀中 國朝賜諡忠愍

潘道根
朱志補

國朝

姚士林靜樂人乾隆丙辰進士壬戌來知新陽愛民若子

以漕政忤上官意罷官論者謂無媿循吏

潘道根
朱志補

黎誕登字于岸廣東順德人乾隆辛亥以舉人任新陽知

崑新兩縣續補合志

卷十

名宦補遺

四

縣癸丑再任有築圩岸功民懷思之

崑山詩存
以上牧令

元

王偕字叔與瑯琊人官崑山學教授善繪事元亡不仕寓

居荻溪之西以荻溪翁自號著有荻溪集二卷見四庫

總目一百七十四集存自

潘道根
朱志補
以上教授

國朝

李光茂四川潼州府中江人監生因公罷官流寓邑中以

漁釣自適諸景筠為賦詩

潘道根
朱志補
以上典史

人物

人物之傳所以存一方之文獻也夫功名顯達之士

聲聞著於四方謨猷載於國史其人皆不待志乘而

傳卽文人學士有著述行世者其言果立亦自足以千古雖失采於一時可摻補於後世非志乘所能湮沒也於中亟待表彰者其惟庸德庸行之人歟事不越倫常之近名不出里巷之間一有疏漏卽姓名由是泯矣今於牖下老儒鄉里至行一善可錄必著於編蓋竊取表微之旨也惟子孫述德或疑爲溢美之詞曹聽品評未必皆持平之論人非素習事屬傳聞去取是非何能盡允糾繆刊誤不能無望於後人矣又史傳之有標目所以紀其人之特行實因人以分類非設類以待人若必強爲傳合則名不副實者多矣昔錢宮詹之修鄞志馮宮允之修郡志皆刪除標

目統名列傳亦違史例今於有類無人者姑從蓋闕期於徵實後之續者或有取爾

列傳

汪埜字應潮號安齋崑山庠生道光乙未 萬壽恩科舉於鄉辛丑成進士改庶吉士散館授主事觀政吏部補官洊升至四川永甯道加鹽運使銜官永甯道時有黔匪逼境制府發庫款十一萬兩備軍儲旣撤防鎗銖未嘗動用同官服其操守是時髮逆初起埜捕獲叛黨輒請置重典與總督齟齬斷斷持爭不稍屈竟以是罷官僑寓郡城杜門不出一意著述蘇松賦稅甲天下粵匪旣平士紳以減賦額請主持最力事上蒙 恩俞允未

嘗自以爲功其豁達無我有如此顧生平以才氣自負
褊淺狹中遇所不快訾警之不遺餘力與道州何紹基
有睚眦之怨至著書詆之誣爲猿子人謂有狂易之疾
所著有盾鼻錄寄蝸殘贅咄咄吟逆黨禍蜀紀各若干
卷持論多偏宕然亦多言人所不敢言汰其蕪累宋葉
紹翁四朝聞見之流也

光緒間續修崑新兩縣合志並與朱成熙皆受聘爲總纂然條
例並出協纂李紉之手堃成熙受成而已故不列於著述之目

李德莪號蓼生曾祖世望祖以健邑志皆有傳德莪新陽
附監生道光庚子順天舉人甲辰進士工部主事升員
外郎中入直軍機處時端華肅順方以御前大臣用事
凡直樞垣者必先謁之德莪獨不往以勤職受知顯

崑新兩縣續補合志

卷十

列傳

六

廟授貴州遵義知府時黔中賊勢方張髮逆石達開自
蜀窺黔將由綦江桐梓犯貴筑遵義實爲孔道所屬正
安桐梓當賊衝提督田興恕以欽差大臣兼行巡撫事
方銳意辦賊與德莪言賞其知兵卽委以軍務至郡紅
白號匪徧四境武弁多驕橫餉糈偶不繼輒譁變德莪
與副將沈宏富深相結畱與共守汰其驕悍者居民獲
安又察屬吏中惟署正安知州于鍾岳精警有謀略時
已將受代言於大府檄署遵義縣事以自助鍾岳四出
擊賊匪勢稍衰石達開窺遵意在必取壬戌秋大至從
間道圍郡城兵勇皆出擊賊城中惟團練數百人德莪
率以登陴晝夜拒守子傳元甫十齡挈以登城謂守卒

曰此吾子也城陷我舉家殉之守陴者皆感泣莫不盡力凡守四十餘日援軍至始解圍以守城勞奉旨賞加道銜次年移攝仁懷直隸廳事有惠政旋調補貴陽知府民惜其去會學使者黎培敬按臨鄉民控後任不法事皆曰願仍得李公先是貴陽有基督教徒黃某怙教勢強佔民婦不允毆殺其夫前任蔡某不敢問更延之入幕民大憤德莪至窮治其獄以理折教士教士悅服卒置黃某於法居民稱慶巡撫張亮基稱其能遂題升貴東兵備道未履任以籌餉自任出領轉運事駐重慶復領協黔捐輸事駐成都軍務平以籌餉功加布政使銜賞戴花翎有旨趣赴新任時貴東軍務已平而苗民

叛服不常一夕聚眾歃血德莪偵知之誅其首魁立定移署貴西道駐威甯州時州城久不修盜賊或潛入城廂乃倡捐修城民情安堵又闢近城田千頃桑麻盈野至今民以爲利旋擢雲南按察使有武弁孫某率部下毆其長官因掠居民總督劉長佑欲窮治之德莪廉得其情蓋孫與鎮將有私怨也白其事誅孫而劾罷其長官眾帖然全活甚眾在滇七年三權布政拔沈滯抑奔競節煩費謹庫藏裕帑項甲申岑毓英安南之役多取給焉乙酉解官歸里道經貴陽巡撫李用清率僚吏郊迎德莪與用清前後分巡貴西初未相識怪其殷勤用清性坦白初見卽曰我知貴州廉吏無踰公者問何以

知曰外官操守可以蒙朝廷給吏民必不能欺後任我
官貴西嘗取歷任冊籍句稽其出入之數惟公不私一
錢耳歸里後謝絕賓客閉戶養疴卽以俸餘修治先塋
更建宗祠歲時祭掃必親平生性情嚴正人無敢干以
私然亦深體人情不爲矯激之論弱冠受經於舅氏嘉
興錢儀吉又學於姊壻秀水沈濂故學派近於浙西閒
居喜讀朱子大全及楊園文集然亦不訾議漢儒詩喜
長慶書好右軍每晨臨懷仁集聖教序一過寒暑無閒
年七十三卒從孫家蘭新陽附貢生官貴州清谿縣令
歷署下江理苗府開州綏陽龍里清鎮貞豐貴筑各州
縣所至有政聲爲士民稱頌綏陽奸民鑄私錢因緣爲

利家蘭親往市集捕私鑄者置之法相率讐服私鑄毀
棄無遺物價頓賤食力小民咸頌德焉任清谿時勸民
種桐茶購置紡織之機擇邑之老婦諳手工者教之三
年民風丕變貞豐有蔡子香者巨匪也糾黨劫掠素爲
民害蒞任後設計捕得之立置典刑民賴以安宣統三
年解綬歸里越一年卒年七十有二

朱以增字禮耕號硯生新陽庠生少孤露贅于長洲顧氏
妻父文彬工詞賦遂從學焉咸豐乙卯科領鄉薦年才
弱冠同治乙丑乃成進士改庶吉士散館授職編修光
緒乙亥大考翰詹列二等拜文綺之 賜丙子分校禮
闈所得多耆宿之士旋補江西道御史巡視東南兩城

轉戶科給事中時有江蘇糧道英樸大學士英桂弟也性貪黷每歲督運北上輒流連京邸恣意聲色公事多廢弛督撫以英桂故皆容忍之臺諫亦憚其家世無敢上聞以增獨具疏彈之 詔下步軍統領榮祿查辦盡得其實英樸遂因此褫職同朝肅然吳縣知縣高心夔精小學能文章江西名士也恃才傲物有妓女已從良矣心夔誣以爲娼嚴治之妓怨憤憤自盡事聞於都門以增劾罷之未幾擢順天府丞轉奉天府丞兼學政持衡平允士論翕服會丁生母憂去官遂杜門不出時吳江祭酒吳仁傑編修費延釐皆中年致仕鄉人並稱爲三高士云以增貌和易而性耿介其貢於禮部也典試

爲大學士寶鋆方秉國鈞故一榜之士列館選者多擢清要每值鄉試輒軒銜命絡繹於途以增于師門非旅見未嘗一通私謁故官詞林十餘年但一與分校之役人咸服其風節而惜其遭遇焉朱氏故有義莊在崑邑以增旣罷官乃一意贍養宗族貧困者深蒙其惠年近八旬乃卒

補遺

明

沈坤字伯生號十洲嘉靖辛丑進士廷試第一人歷官南京國子祭酒性鯁直任氣違俗居母喪時倭寇適犯淮郡散貲募鄉兵千餘人自教練之寇縱火延燒官兵且

卻坤率所部親當矢石射中其渠帥乘勢追擊寇乃去未幾倭復以數十舟溯泗而返焚殺尤烈坤與戰復大破之時人呼之曰狀元兵巡撫李遂薦其功起爲北祭酒爲給事胡應嘉所構巡按御史林潤之劾遂被逮卒於獄人多冤之祀淮安郡鄉賢祠

黃暉字日昇弘治庚戌進士授工部主事疏渠通漕考最遷刑部郎中治畿內獄用法平恕兵部尙書馬文升舉暉按邊吏失事者神木知縣某密致銀三千兩暉拒之卒當其罪主將論死忤權貴引疾歸暉性敢決不媿阿取容博綜古今持論若懸河聽者皆竦

乾隆蘇州府志歸吳縣今考暉

自著蓬窗類記屢言吾崑是暉實崑山人

崑新兩縣續補合志

卷十

列傳

十

國朝

許虬字竹隱號敏菴元和甫里人崑山籍少穎異補諸生與從兄弟儼定升輩有高陽八才子之名順治戊戌成進士授貴州思州府推官州峒苗雜處境內每有騷動大抵由墨吏誅求土司激變虬輕騎入苗境曉諭亂者示以禍福苗皆羅拜輸服出金爲獻卻之苗遂大定是秋分校文武闡解首俱出其門時推得士陞任思南以同知管知府事署守道篆轄思南石阡思州銅仁四郡俗信鬼神病卽廷巫禱神虬授以驗方良藥民始知醫積習乃革旋以艱歸黔民如失怙恃服闋補雲南澂江府知府改授臨安府同知時逆藩道梗隨征荆岳尋除

浙江紹興府同知時軍興平閩征調頻仍虬輓芻督餉
身任其勞暇則課士講學文風丕振擢湖廣永州府知
府時逆藩甫平餘孽負嵎軍興旁午千里運糧楚民重
困虬請於大吏立法便輸民困乃甦旋卽致仕歸士民
送之百里之外虬詩爲新城王士禎所推與汪琬尤侗
輩相倡和子心宸字紫臣心宸字丹臣心虔字冰臣俱
太學生心康字安臣由長洲縣學生入太學並以詩名
徐陶璋字端揆明都御史源之後康熙乙未殿試第一授
修撰陶璋居心和厚學問醇實時論以公輔期之而淡
於榮利乞假歸杜門掃軌研精經學晝夜不倦乾隆元
年補前職纂修 世宗憲皇帝實錄以病卒于京兄模

崑新兩縣續補合志

卷十

列傳補遺

十一

戊戌進士亦以文行稱

政績

補遺

明

楊楷字元範成化甲午舉人居里以師道自立官平陽知
縣嚴重廉潔請託不行有疑獄不輕讞決在任重建學

宮以疾歸子偉舉人

潘道根
朱志補

陶纘字述之別號醉竹世居淞南陶家橋唐高士峴後裔
也成化庚子舉於鄉甲辰成進士丁未廷試釋褐授刑
部主事坐同僚罣誤謫判浙之處州纘負氣挺挺趨謁
奔走不善伺顏色而居其上者復故以禮法繩之居官

恆鬱鬱不適志及期歎曰戀茲五斗將使五柳笑我遽投狀而歸方判處時按臺以其能命治溫之積久疑獄承檄往假設神道鉤校得情積案立剖浙之人稱神君焉罷官家居謝絕世故惟曰以課讀爲事子五名文雲者字慶甫有聲於庠後升太學三應順天鄉試薦而弗售者再歸卒於家弟綵字美之號澱航以例貢謁選授直隸大名府元城縣丞職主馬政而牧地丁夫久爲豪右侵占調飼失時馬多瘡斃綵白監司盡復其故馬大蓄息先是馬戶歲有例餽綵曰嗟乎此孰非吾赤子瘡夷血肉乎吾寧死不食此也卻其餽弗受且立石永捐其例馬戶戴其德頌聲溢於路撫按嘉其能屢加獎勵

居元城二載遽投揭告歸太守王公行文勸諭謂君毋辭我去且爲視事計簿已書上考矣行且晉爾秩益爾精以勵我屬也綵曰北窗高卧吾家素風奈何以斗粟溷我哉速驅車不顧而去士論高之

淞南志

張种字成之家石浦憲副和參政穆之弟幼與諸兄同出進士張經之門經之教以絕嗜慾爲主謂嗜好斷絕則小人無緣而至天下事始可爲也种承師教能自振勵兩兄並官於朝而种猶進退諸生閒子子自將益檢柙其行以成化中廩生四十以上者入監例貢入京師積資授濮州判官州介居魯衛地列四衝种判事能協於職吏畏其威民樂其惠而尤能絕去嗜好矢守清正苞

苴之獻無人焉葬泮川鄉在字圩子申甫進士

淞南志

張申甫字汝翰父种以明經通判濮州有政聲申甫敏慧絕出古今全史類能識誦發爲文章宏深奧衍而不軼於法操觚家咸宗師之弘治甲子領鄉薦正德戊辰登進士觀政禮部授大理寺評事故事大理讞詔獄評事坐最下所議不合輒起力爭廷尉亦持其奏不遽上申甫性剛介用法平有不直執簡白大吏必如其議而後止時廉直之聲震於輦下

淞南志

陳鏞字德振號前溪又號玄巖世居淞南尚書浦年十七補縣學生試輒高等嘉靖元年壬午領鄉薦九試南宮不第庚戌復上公車以疾卧逆旅不獲入試鏞以親老

崑新兩縣續補合志

卷十

政績補遺

十三

謁選吏部時冢宰夏公言試鏞第二授蜀嘉定州守嘉古犍爲郡有峨眉之勝夏公奇鏞文故檄守是州欲以變文體歸于大雅鏞至蜀推廣德意振興文教未朞歲有治聲蜀之士人咸宗師之丁外艱歸服闋相國徐公階愛鏞才擬內轉之大展其用方上道遽疾作卒年六十有三子伯瀛伯洪伯潮俱縣學生葬浦西非字圩

志

淞南

葉夢淇字尚原號約齋文莊公盛孫少游邑庠恩蔭入國學屢試棘闈不遇及赴吏曹錄第一授大名府通判其職專董國稅兼審力役分理訟牒在任暮年諸務克舉丁內艱服闋改台州甫下車大旱民望雨虔禱立應倭

夷內犯人心搖搖復以計潰之去台有鄉賢祠事久弛給以閒田俾世守勿替三載考最有清白公愼之褒進衡州府同知衡濱于洞庭湖水泛溢水患迭興又編茅爲廬居人不誠屢遭火患夢淇至設法禁禦規畫周至二患俱息頌聲盈路蒞任三年以疾卒於邸舍夢淇生長名家思自立以光前烈先朝誥勅遺文寶護若新文莊所著涇東水東菴竹堂開封紀行西垣邊奏諸稿有裨世道者悉梓以行世一生儉以居身嚴以馭下庭無雜賓帑無餘積棺殮之資給於僚友而已卒年四十九

子良材

淞南志

陳廷瓘字思辨號夢陽元至元進士德甫裔世居青邑自

崑新兩縣續補合志

卷十

政績補遺

十四

廷瓘始家尚書浦廷瓘生有異質七歲能文長通經史及韜略諸書嘉靖丙午以廩貢授學正甫之任倭寇方張撫軍朱紈素契其才條詢方略陳對洞中幾宜卽奏徵幕府贊軍務寇破邀薦有學耀文星才藏武庫之譽後紈爲權奸所中遂歸老淞南舉鄉飲大賓著有禦倭略二卷廷瓘祖宗智與弟宗信故高士也別墅在磧溪南陳隆涇廷瓘始生此有神童之目土人遂名神童涇

蓋地以人重云

淞南志

梁鳴鳳字九成號在竹福建泉州府同知紈子以諸生援例入太學謁選吏部授四川馬湖府推官馬湖地險惡多蠻獠窟穴府所轄皆長官司守土官安姓者承襲弘

治中始設流官俗尙未變鳴鳳至卽攝篆理積務乃勞
心焦思鉤深摘幽務得下情獄繫盜數十人廉得其枉
悉破械縱之遠近歡呼稱爲神明瀘庫卒盜金久乃覺
州吏撈掠後守者將傳致其罪鳴鳳承上官牒往按之
事遂白居數月條陳地方利病數十事上官悉罷行之
移文他郡令視爲準則嘉靖壬午丁內艱去乙酉復除
湖廣之德安府內地民醇鳴鳳乃夷易應物事無鉅纖
剽決無畱滯屬縣長吏某墨敗陰求納賄以免叱而卻
之卒正以法年末期政譽出馬湖上忽一日暴疾卒年
六十僚屬士民間之無不驚悼焉子會國子生顧鼎臣墓誌銘
邵鴻漸字磐石家淞南少卿山下廩貢入太學授鳳陽府

崑新兩縣續補合志

卷十

政績補遺

十五

盱眙縣教諭振興學校文雅蔚然以薦授知四川羅江
縣事羅爲成都屬邑號稱繁劇鴻漸至宣明教化通達
幽隱獄無冤刑縣無盜賊羅人樂之以老歸憲宗朝屢
賓於鄉以式後學卒葬少卿山下門人張大復以文祭

之淞南
志

王慶字元吉號舟軒別號菊菴以列貢授湖廣咸甯訓導
咸甯有宋名臣馬文簡祠鄰學宮歲久傾圮慶葺而新
之士風民俗由是一變九載績最陞河南尉氏教諭尉
氏地多沃壤居民不諳水種慶常署其邑事築堤岸濬
溝洫以江南耕作教民開墾得熟田千餘頃至今德之
巡撫秦嘉其能將薦知州縣以母盛老乞歸及旋里而

母已卒一月慶時年六十餘哀痛如孺子家居結社賦詩以終年七十六卒葬山陽子三侏俸億億見孝友

朱旻

王舟軒墓志銘

句邠字希古號絜菴曾祖晟字克昭性坦直與人無忤顏遽色好遠游工操奇計贏之術家業日興祖海字巨源善排難解紛爲鄉里所服父昞字叔明號宜亭天性孝友與人交無町畦舉鄉飲賓邠承父教少有文譽未弱冠卽餼上庠萬歷己卯舉人再上公車不第遂就銓爲銅陵教諭督課諸生日與講藝剖析經旨聞者忘倦邑令嚴憚之性濶達不知周旋無故事有不便於民者必奮袂往諍令益銜恨會陞泰甯縣知縣遂陰中之謫湖

崑新兩縣續補合志

卷十

政績補遺

十六

廣按察司照磨從來謫官者多不親職務邠更勤愷自勵上官以疑事委輒應手辦遂交列剡章擢黎平府推官是時苗民甫靖邠一意撫綏嘗攝郡事獄有冤抑立爲平反黎俗不知婚禮多野合邠爲定嫁娶之禮律夷風丕變黎民圖像祀之致仕歸邠有妹歸王氏早寡矢志守節邠命子迎養之子允玉字勉吾長洲縣學生孫湯銘字叔藩郡學生

顧孝宏字弘之號萍菴幼失恃孝事後母弱冠補諸生熊公廷弼拔食餼屢試而躋資滿貢入太學當神廟戊午遼左潰孝宏拊膺歎曰中原自此多故矣承平日久狃於晏安將驕卒情鼓鼙聲震遁走不暇猝有緩急安所

倚賴間於誦讀暇調習弓矢嫺習鈐略慨然有經世之志及教子弟亦令兼通孫吳兵法曰時事至此徒工帖括無爲也故子清晏熊皆以武雋孝宏需次國門見綱紀曰弛作杞憂十咏抒寫忠愛已授溫之泰順訓導泰小邑建自景泰垂二百年士無捷南宮者向咎學宮不得地已兩易矣孝宏素精青囊術復相陰陽釐向背令山水拱揖自後士之獲第者相繼邑僅二十里居民僅數姓賦不盈四千時軍餉孔迫上官以大邑例追縉紳優免及契稅地畝折色助餉孝宏語屬吏曰邑本無紳何有優免山田價尙無幾按畝科稅重擾民矣橫征以媚上予死弗能也乃列邑之大小分爲三等泰在應蠲

例巡御史左光斗令如議行兩浙小邑得免加稅孝宏力也斗廉孝宏才薦列於朝且蒙顯擢會國變而止鼎革後南國尙阻聲教欲召用之以父老力辭所著有萍菴集行世卒年七十葬昆圩子清晏武進士熊國朝武士鶴儒士清寅庠生

崑南志

國朝

王古海字水一號瑄朗明淮撫贊畫知縣廷瞻子世居邑城後家淞南王巷明季補長洲縣學生以茂才授知河南中牟縣事流寇構逆棄官還吳入國朝順治二年乙酉三吳新歸版圖督撫上議懷輯海疆彰施德化以古海故吳人習知土風有治才人地相宜薦授蘇州府

安撫同知雖官本籍不徇豪髮私綏懷屬邑俗賴以安
八閩初定海氛未息復命同知福州府事有惠聲以疾
卒於官年三十八子三幼祈永字鎔成每向人稱貼堂
王以自耀云

余讜字漢班號宸箴以諸生改入太學得試中翰授內閣
中書舍人掌典籍事康熙十三年欽命隨順承郡王率
師討吳三桂加分守道銜署常德府知府事三桂平復
命入京授陝西鞏昌府同知駐岷州以浥爛茶筵一案
解任歿于岷州客邸讜幼善屬文蜚聲士林尤工行草
在國史院十餘年朝廷制誥多出其手在湖廣幕府羽
書旁午磨盾草檄頃刻立就王師下滇南運籌帷幄讜

謀居多郡王倚之如左右手嘗作書貽三桂云在公之
目前雖成騎虎之勢恐公之事後終成畫犬之形達人
不妨悔過智者亦重知幾乘萬民塗炭之時散諸將紛
紜之計退位滇中仍居藩服不惟邀聖明之寬典抑且
保苗裔之永存開陳禍福勸其解甲歸順三桂不從卒
致殄滅岷州古西羌地民獠雜處土司流官參半讜招
懷遠邇恩威並用人皆畏而愛之卒之日宦橐蕭然幾
不能殮年六十三子五中垣字師周太學生考授州同
知天姿倜儻遇事敢爲里中有不法事輒直陳當道羣
小側目尤工書得北海遺意台垣字象三太學生隨父
在岷州以屯田功授衛千戶皆早卒薇垣諫垣掖垣俱

太學生

淞南志

李鴻字羽儀一字漸卿恭簡公校族曾孫父坦字冰谷爲諸生有陰德與申文定時行同硯席鴻好學嗜文史詩賦旁通數學及岐黃陰陽之書所交皆知名士文定以女許字就婚京邸補涿州諸生遊成均舉萬曆戊子順天鄉試乙未成進士授上饒知縣邑當閩省衝依山險多盜民健訟難治鴻至榜二語於庭曰三尺矢諸天地方寸畱與子孫鉏強斥黠片言折獄約束胥吏催科無有擾閒與諸生講道論文由是通經學古之士彬彬興起政聲著稱大吏皆重之諸貂璫騷擾江西奸徒陸泰助其攢噬開採銀礦鴻聽之既而冶煉烹煎得不償失

崑新兩縣續補合志

卷十

政績補遺

十九

奸徒乃自解散又欲開採禁木鴻引璫至童山路險不能達事乃寢科泰等三十人罪斃於獄朝廷信璫讒落其職鴻卽日解印綬歸饒民築生祠春秋祀之年五十卒所著有封禁錄寶笏堂集禹貢互釋賦苑講義會編本草纂要脈法指要子平元理嗜蔗編國憲識略子繩芳襲芳毓芳並有聲於庠

李鴻傳應列於明

馬雲舉字漢翔號崑輪雲南參政玉麟孫父天駮雲舉中順治丁亥進士循部例得山西河曲令河曲邊地土瘠民貧獷悍難治旣下車不窮追逋賦曰吾摘其負多者治之而已秋旱蝗不報曰報需勘勘則勞官官勞則民擾吾嘿恤之而已有訟妻毒其夫者詞連妻鄰及賈客

數人久不決訊之曰以水銀置飯中水銀性流入飯則走何能殺人非其罪也竟釋之攝保德縣事築城埤疏井泉蝗不爲災初至才四十戶比去官九百餘戶先是撫軍申公檄燕南北毋蓄馬匹器械而交城之變作總兵姜瓖爲撫軍所憚有叛心繼而反陷晉中郡邑六十又四縣令二百人或降或逃或被誅無一全雲舉以愛民官民感之爲死守時舊令張堯卿在圍城中爲內應執雲舉械送賊營卒不屈會官軍至事平當道檄令仍知河曲卒以失城不得題叙罷歸構別業於西郊以山水自娛絕無世路聲華想逍遙園林者二十年康熙戊申卒年六十四著有萬卷樓簡編凝秋堂集馬氏規範

子七

謝時晟字東範號丹崖世籍新安父贈君應彬始家淞南千墩里生有異稟讀書過目成誦少工制義數困童子試遂以武庠領康熙己酉鄉薦癸丑成進士例授三等侍衛以母老辭時楊昭武駐松江劉總戎鎮崇川往參幕事咸見敬禮贊畫軍機多所裨益甲子謁選授江西興國營守備與邑令分職共理有政聲資滿進建寧都司嚴保甲訓鄉勇整飭軍備一如興國日報最授臺灣遊擊臺灣爲鄭氏故窟憑山負海生熟二番猶多不靖因相其形勢繪爲詳圖奸宄蹤跡歷歷在目恩威互施罔敢蠢動尋遷建寧中營遊擊兼署協鎮事適鄰壤山

賊竊發戒飭伍卒防遏要害境賴以安軍府愛其才欲
疏諸朝自以年老具文乞骸以明威將軍致仕卒年六
十有六所著丹崖詩集五卷

宋堯英字禹聞父君榮長厚好行義堯英少穎敏爲文操
筆立就年二十四以滇省例納貲爲縣學生閉戶窮經
寒暑無間數年精易學貫串性理旁通諸子百家康熙
癸酉舉於鄉數上春官不第授江陰教諭士子聞其至
皆相額慶堯英以倡率文教爲已任用白鹿洞規條與
士更新月有課歲有程愛護人才無不得所兼攝靖江
學士子皆渡江而來秩滿將遷縣令丁內艱歸送者環
數里堯英哀毀備至服闋後尋卒年六十六子世長字

崑新兩縣續補合志

卷十

政績補遺

二十一

祥發郡諸生

曹澄字沛霖號練江新陽縣學生乾隆壬午舉人大挑分
發山東署平原縣事時值歲祲飢民載道同官不敢報
荒澄獨通詳請賑大吏奇其才竟得請歷署邱縣亦有
能聲旋補博興縣視事明決奸吏不敢玩法先是博興
屢有蝗患澄抵任捐廉建司蝗神廟至禱輒應邑人咸
頌其德後以憂歸闢室於宅之西杜門教子遂不復出
年七十卒子佩金字震鈞號東畦太學生究心六法收
藏前人真蹟甚富曰臨摹不倦尤好吟咏錫嘏字康藩
新陽縣學生善畫山水亦工詩

忠節

補遺

明

顧夔字虞一縣學生父叔懷字二懷精於靈素之學夔好學嗜酒與徐景元比鄰每大醉遇景元輒醒天啟丁卯舉人選授廣西恭城知縣國變時殉於任子休文式文奉衣冠以葬姪貞吉以不忍薙髮而死

許氏志稿

黃謙字履祥世居淞南葭葭浜少好學補諸生與朱節孝集璜爲忘形交生平以名節經濟爲己任以世多故凡天文方域賦役河渠兵戰之書無所不識甲申邑令楊公永言濬治水利命謙主夏駕河工殫心籌畫晝夜無寧晷晷年工成不兩月大兵南下邑奉楊公城守謙自

崑新兩縣續補合志

卷十

忠節補遺

二十二

葭葭浜徒步三十里入城佐楊公修守戰之備城潰與

朱公集璜相勗不屈被殺

淞南志

金方烝字雲亭中城兵馬指揮金夏曾孫乙酉七月殉節

潘氏朱志補

鄭玉佩字順陽太醫院醫士受粲字素卿時雍字堯民俱

殉乙酉難

鄭氏譜

鄭之祁字宋叔號裕昆禮部儒士淳篤有孝行明經好古造次必循禮義辛巳歲饑倡舉同善會賑粟給絮全活甚眾士大夫高其行兩舉鄉飲大賓乙酉七月六日城陷整衣冠從容赴義死年六十九孝廉華乾御爲立傳趙君朔王瀹生朱與升王漢三亦城破同殉呼谷傷故

交詩有煨燼同歸玉石區之句

潘氏朱志補

鄭士元字啟安禮部儒士夙有志操砥礪名節乙酉城陷赴水死年六十子詞正字子義博通羣籍尤沈潛六經心有所得則記之每讀匹夫不可奪志句輒投筆若有所思家貧藉館穀以養親城陷與父同日殉節年三十六妻女亦投井死孝廉華乾龍爲傳其事

蔡方燧居葑關外乙酉不屈死

潘氏日記

張崑字崑山幼饒胆略志趣異常兒童時卽部勒家眾左右指揮如兵卒狀祖魯得見之大驚明季從宦粵中歸道遇何兵備亂卒被掠何時兵敗懼誅阻山而屯得崑欲殺之崑具言其家世何色動曰果爾則通家子矣今

崑新兩縣續補合志

卷十

忠節補遺

二十三

海內鼎沸盍畱此以觀變崑曰可遂字以女女天復以義女柴氏妻之何旋死崑代領其眾屯聚如故久之會其眾曰若等所爲終不義今永明已稱號於滇欲偕若等歸焉可乎眾咸諾遂率其眾歸滇值邊警崑出戰而捷以功授兵部丙申孫可望外叛崑謀遣將討之時永明西入緬甸國勢不支恆覽鏡謂家人曰術者謂吾劍眉鳳眼方面修髯後必貴吾問之可斷頭否術者曰可善終惜年不永耳吾未知今死何地也戊戌秋平西王吳三桂兵至滇給以內應要崑往至則設酒謂崑曰天命有歸幸毋自辱崑知見始罵聲不絕口平西曰君不富貴盍飲此酒乎崑一吸而盡擲盃擊三桂面不中身

忽發戰頭足相就而死尸三曲不能殮士人憐其志火化而函以銀槨內之瓦缶殯于白塔寺年三十三南中聞之贈封爵諡忠武幼子繼祖畱滇長子思祖歸吳述其事如此居張浦故宅耕田以老云

陳觀字行五家淞南沅沱涇性敦大義甲申三月聞京師變卽素服慟哭旦起必號先帝數聲衣中常懷崇禎制

錢以示不忘故國麻冠白褶終身不易死之日遺命以

喪服歛

潘氏朱志補

魏肇曾字子韶以好施毀家與其妻並立志出家適南昌

外氏反覆之際竟以髡髮受誅臨刑念佛不輟

潘氏朱志補

徐良志居大瀆塘有勇力明季盜賊所在竊發殺其人掠

崑新兩縣續補合志

卷十

忠節補遺

二十四

其貲甚者火焚其室廬人不敢捕一夕良志聞其女兒子被殺卽手持烏槍與老僕俱駕小舟追盜至陽城湖濱天已明及之擊盜殺數人盜棄舟登岸良志與僕亦從之火藥盡卽以槍桿擊賊僕持櫓助之至日午盜俱受傷死餘遯去因焚其舟挈所刦資歸後大兵克城良志死於難今其裔猶存家藏石鼎一其重百鈞相傳良志手舉之過其頂云孫某業冶銅家麗澤門外與良志俱以好漢稱力尤勝良志嘗於郡買銅銅不良晨負以入郡易之仍負以歸銅重數百斤往返二百里日尙未晡也其勇而善走若此大兵南下孫守西門戰駟馬橋下殺數人以無援死又有邵百步以善射得名邵家村

人力遜于良志而膽略過之大兵至邵守北門城破力
護百姓出已竟不去死於難其家得其屍葬之邵村口
道光初墓壞骨猶未朽其首大如栲栳云里人云當時
好漢之稱孫第九良志第十邵第十三不知當時共若
干人其人後皆何若今不可攷

國朝

陳以喆字少菴住落霞浜世業醫監生椿年號佩華長子
少讀書習舉業庚申四月避居北鄉遇賊被擄大罵不

屈死

星溪
志稿

翁玉車塘里人粵逆竄車塘玉率鄉人數百拒之賊不得
進怒甚率大隊至鄉人驚走玉挺身就執賊以毒刑拷

崑新兩縣續補合志

卷十

忠節補遺

二十五

問命跪火練又燒錢至紅灼其膚令指同謀者卒無一

言遂被害於葦葭濱之煤屎墩

孫炯
稿

楊錦彪字子英居安亭楊家角好俠尚義咸豐庚申粵匪
亂錦彪募鄉勇爲拒敵計四月十六日遇賊葦葭浜鬪

死年二十七

錢寶
珩稿

王悟香闕區五畝周家浜人有膽略咸豐庚申之難集村
團以禦賊賊初退繼復麋至悟香持挺直前振臂呼曰
甯死毋自餒遂被害

錢鳴
球稿

王學圃闕區二畝古村浜人富有財產咸豐庚申粵匪沿
江紛擾學圃家距三江口僅半里家人均渡江遠避學
圃獨仰天歎曰毀家紓難此其時矣大丈夫安肯貪生

受辱耶賊至被虜肆口怒罵至河泥橋被害錢鳴球稿

張福敦字景巖明思南太守汝舟之苗裔也居城中咸豐

庚申之變福敦先遣妻孥遠避獨整衣冠執卷危坐賊

至以刀斫福敦福敦罵不絕口遂被害其妻子亦同時

遇賊於北門外赴水死孫文浩文淦俱被虜不屈死

葉如璠字白瑚號子淳國學生世居千墩鎮為區六畝同

治元年八月初六日為粵逆虜至浙江嘉興不屈投河

死顧端中稿

卓行

補遺

明

崑新兩縣續補合志

卷十

卓行補遺

二十六

馬勗字文遠號東園甫里人宋宣教郎友直裔少孤事母

謹出入必告初好內典後讀儒書通易傳史記洪武中

游京師見涼國暴尸於市感而竊歎幾為邏卒所縛遂

絕意榮顯歸築精舍于眠牛涇引泉疊石廣植竹木名

之曰東園與徵士周興鄱陽令趙文輩飲酒賦詩賡唱

風雅巡撫熊槩重其名數延見有邑民虞宗蠻以豪橫

獲譴某僧與槩善為宗蠻請槩曰當問馬勗僧乃以三

千金為勗壽勗不許遂沒宗蠻家臨安關吏苛畱人勗

白之槩遂誅關吏勗嘗陳民間疾苦槩能用其言民感

其惠繪像以祀子三望企行歸有光傳參許氏甫里志稿

沈誠字敬言家始長洲至誠始占籍淞南之吳家橋時同

邑王樵玉先生隱居教授倡明正道誠移家就學悉得其蘊爲門下高弟永樂中以郡縣薦授松陵主簿能以善政化民佐理期年頌聲載道以老告歸誠性善飲官松溪簿日盃斝不脫手邑令懼其以酒廢事屢覘其政則井井不亂歸里之後日與二三知契引觴劇飲嘗竟日大醉或諫之則昂其首而嘻曰吾將投老醉鄉以畢吾素志君毋溷人意竟以此得疾卒同邑鄭文康誌其

墓

淞南志

國朝

周鈿字子圓參政大禮孫少邃於學以能文稱由增廣生中崇禎庚午副榜遭甲申之變退老淞濱足不復渡秦

崑新兩縣續補合志

卷十

卓行補遺

二十七

淮識者高之著作甚富有詩集若干卷

淞南志

錢近仁少孤貧流轉至蘇城於府治東文丞相祠之西數十步僦屋半間以補履爲業顧好學而不識字以補履所入從人問字一字餽一錢後遂能徧讀羣書門內橫木板三四尺置古書雜物於其上里中童子有來就學者不問修脯往往多至二三十人然不加督責或散去則補履如故有王繩孫者聞而慕之與其弟楊孫及羣從弟子迎致其家禮待甚厚長洲薛起鳳彭紹升以學行高吳中少所許可皆樂與之游時時稱道其爲人與之談時及道家言并熟讀近思錄嘗入濂溪祠焚香肅拜卒時年七十又五吳縣汪縉以僅一識面未及與語

爲憾乃爲之作補履先生傳

王德森稿

陸西溪居周墅鄉塘西邨平生慷慨好義兼習武藝咸豐庚申之變西溪與朱靜遠陳日順等招集義民互相保衛于五月初八日逆賊率馬隊至鄉肆掠西溪手持鐵棍親率義民抵禦自未及酉義民傷折大半而逆賊文某攻之愈急西溪且戰且退至棠蔭橋得負嶠之勢窺文某至舉棍直前撲之賊墜馬其眾退入城中明日賊復率大隊來西溪見勢不支遂避往他鄉至同治十年返家年已六旬未幾病卒

盛某安亭人失其名道光季年六十餘夫婦子女六七口皆仰給於館穀值水災大無禾官施粟濟眾者當先籍

崑新兩縣續補合志

卷十

卓行補遺

二十八

姓名他人爭往自署盛獨閉門堅卧炊煙斷者累日矣或勸之自言於當事盛曰執事者皆吾友也豈不知吾貧者吾自言是彰彼之不恤故舊也且庸詎彼之終不吾恤而汲汲焉當事聞之大慚親賚米送之門後數年卒年七十餘

崑新兩縣續補合志卷十